

Efésios

¹ Natyo Paulo, Jesus Cristo niraene kakoare notyaonita Enore xaokalita. Hoka naxikaty exe babera Enore koamaniya tyaoniterenae wenakalati Éfeso nali tyaoniterenae ana, exahe tyotya Jesus Cristo koamaniya tyaoniterenae ana xoaha.

² Kasani waiye ximehexaiko xisaona wexe Enore hiyeta, Xekohaseti Jesus Cristo xoaha hiyeta naokita.

Enore Waiye Xomokareheta Wiso Cristo Hiyeta

³ Maika wihalahare Enore Wiyekohase Jesus Cristo Nexe kakoa. Hiyaiya, Cristo koamaniya wisaonitere hiyeta atyo waiye mokita wiso hoka ijita womana tyotya xoalinihare waiyexe enokoa nalitare.

⁴ Toahiya waikohe maomakaharetatere xowaka, Enore koxaka terota aoka wiso haomana, enomanerenai wisaona maheta, Cristo xema maniya wisaohenere hiyeta, hoka waiyexe maniya taita wisaona maheta ehaotita. Haxawaiyera wiso hiyeta

⁵ Enore koxaka terota haisaninae aowita wiso, Jesus Cristo xema maniya wawenane hiyeta. Haxaokala ximita nikare mokita wiso.

⁶ Hatyo hiyeta maika wihalahare Enore kakoa exawaiyera waiyexe hiyeta, exahe maxaimanahreta isehenere womana Haisani haxiyakawala-hare xoaha hiyeta.

*Waiyexe Maniya Nawenatyakeheta
(1 Coríntios 15.2-4; Efésios 2.8-9; Hebreus 7.25-27;
10.10-14)*

⁷ Hiyaiya, Cristo wainihenere atyalihose xaimaholatyaka hiyeta atyo wikaiyakihitita, hoka iniyalahare wománenai atyo kamaotyanetyakihitita. Kaxiyani, waiye kaiserehare Enore xawaiyera,

⁸ kalore isehenere womana! Enore tyotya kalore hawaiyore exahe haxahekola kakoa,

⁹ tyoma aokowitere tyoma, hoka hotikisa womana hameteneta tyoma aokowiterehare Jesus Cristo hiyeta.

¹⁰ Hatyo tyoma aokowitere atyo ite haxowaka xane hikoahena enaose ferakene hoka ahohisakoahetehena tyotya enokoa, waikohekoa harenai tyaoniterenai hoka Cristo taita Exekohaseha tyaohera.

¹¹ Hiyaiya, tyotya atyo kaomaka Enore xahekola exahe tyoma aokowitere akereta. Aoka wiso hao-mana enomanere hotyali wisaona maheta, Cristo xema wisaonitere hiyeta. Exahekola akereta, ex-ahe hetati tyoma aokowihenere akereta.

¹² Hatyo hiyeta wiso hotohare tyare atyo Cristo xahita wavyahita hoka maika wihalahare Enore nerore kakoa.

¹³ Nikare tehitiya xisaona. Waiyexe iraiti xas-emehenere isekohaliti niyasehare tahi iraetere xowaka xityakeko Cristo. Hoka Enore aokitere akereta kaferoxatya xiso haxiyehare akereta, Isekohaliti Waiyexe isehenere xomana xowaka.

¹⁴ Isekohaliti Waiyexe hiyeta ite Enore hao-manerena ana isa aokowihenereharenai kax-

ekaka womana. Haomanere hotyalinae ana atyo ite wenati waiyexe isa. Hatyo hiyeta maika wihalahare Enore nerore kakoa.

Paulo Niraexala Éfeso Yerena Ana

15 Hatyo hiyeta nasemehenereta Jesus Cristo xityakekone, exahe xawaititere tyotya wihinaeharenae tyakekohatiyenae

16 hekota maisa niraexali Enore hiye nahalakisare. Notyxematyia minita xiso niraexali kakoa.

17 Exahe naxita Enore, Wiyekohase Jesus Cristo Nexe waiyexe: kasani Haisekohare isa xomana hoka airihalinikisa, awaiyoloniakisa xiso, hotikisa xomana Enore hoka xawaiyore ekakoa maheta.

18 Naxitene, kasani axahekotyanikisa xiso hoka xiyaia maheta xaokanatyakalati, exahe waiyekohalaka tehitia xomana kaxatyahakitere ana kawihenere xiso. Exahe waiyekohalaka maheta tehitia xomana xoalinihare waiyexe isa aokowiterekohare haomanere hotyalinai ana.

19 Kaxiyani! Kalore atyo iniyatere tyaonita wiso tyakekoterenai kakoa. Kasani hatyohare waiyekohalaka xomana naokita.

20 Hatyo iyateliti atyo etake Enore hotikihenere haiyatere mawaiyakahare hoka ekasekihetehenere Cristo hoka hafihini maniya mohenerene enokoa nali terota.

21 Cristo atyo kaxaikota tyotya kalorexenai enokoa tyaoniterenai, xekohasetinai exahe iyatelitinai kakoarenai harenai. Exe waikohekaoa tyotya xekohasetinai tyaoniterenai, exahe waitare waikohekaoa tyohenere xoaha xahehare atyo.

22 Enore atyo moka tyotya xoalinihare Cristo kiji katyahe, exahe Cristo hoka kaxekaka tyakeko-henerenae ana, Exekohaseha tyaona maheta.

23 Cristo atyo kaiyihiti akereta enomanaha hoka tyakekohenerenae atyo Cristo háre akereta tyaonita hoka etalokoatitene tyotya akiti.

2

Iniyalahare Wenati Maniyata Waiyexe Wenati

1 Toahiya ene ekamane akereta xisaonita, Enore ximatyakekonene hiyeta, exahe iniyalahare xománe xoaha hiyeta.

2 Hatyo xowaka ene iniyalaharaho xisaonita, exahe xityakekota ene etake isekohalitinae kax-aikotyasehare kaholahekoare tyaonitere. Hatyo atyo kalikini matyakekoneharenae kaxaikota.

3 Wiso tehitiya hatyoha akereta ene wisaonita hoka wiyahekola ewaxirahare xema ene wisaonita, exahe xoalini hare wahekoiterehare, wawaiyetiterehare xoaha xema ene wisaonita. Nikreta hatyo haiyaharenae akereta ene Enore iniyalahare xomokala mahetare ene wiso.

4 Xakore hoka kalore atyo xairakoaneharetyati kakoare exahe xawaiyetyati xoaha kakoare atyo.

5 Ekamane akereta ene wisaonita wimatyakekonene hiyeta, hoka ekasekiheta wiso Cristo wityakekohenere hiyeta. Hiyaiya, Enore nawaiyexehare hiyeta atyo xikaiyakeheta.

6 Enore atyo ekasekiheta wiso Jesus Cristo wityakekohenere hiyeta, exahe hahotalita moheta wiso enokoa nali xekohasetinae wisaona moheta haxawalita Cristo kakoa.

7 Nikare Enore tyoma hotikisa maheta haiyanai wajikinita tyaohenerenai kahare xoalinihare waiyexe xema ana, haxawaiyera hiyeta atyo hotikisa hatyoharenai Jesus Cristo hiyeta.

8 Hiyaiya, Enore xawaiyera hiyeta atyo xikaiyakeheta xityakekone hiyeta. Hatyoharenai atyo maisa xinalitare xini tyoita, xakore hoka Enore xekane maxaimanehare atyo.

9 Xikaiyakehetehenere atyo maisa xaiyatere-tyoa xahahenere xaimane xini, hoka hatyo hiyeta maisaiya xala hare aokowiharetyoita.

10 Hiyaiya, Enore atyo tyoma wiso, hoka Jesus Cristo kakoa hahotalita wisaothenere hiyeta aenaetya wiso waiyexe wisoma maheta. Hatyo waiyexe atyo koxaka memere terota mohenere womana.

Cristo Kakoa Haxawalita Nawenatyaka

11 Xotyaira toahiyere xawenane: maisa atyo judeunae xini xiso. Hatyo hiyeta atyo maxaikonomanere milihesakaharenae aokahita xiso judeunae. Hoka judeunae atyo haxaokakahita, “Kax-aikonomanere milihisakerenae”, nita. Nikare atyo iraeta judeunae halitinae nómame xaokaka.

12 Hatyo xowaka ene haware xisaonita Cristo nonitata, mawaiyakahare hotyalinae ene xiso. Exahe maisa ene Enore haomanere hotyalinai aokiterenai koniye ene xiso, mawaiyakahare hotyalinae ene xiso. Exahe iraiti Enore haomanerena ana aohenere ene atyo maisa xomanere ene xini. Maisa ene xoare xatyahare, exahe ximaenorexahare ene xisaonita.

13 Xakore hoka kalikini atyo Cristo kakoa hahotalita xisaonita hoka xiso seko Enore

nonita tyaoniterenae atyo xikakolatya ehaliya xeta, Cristo atyalihose xaimaholatyaka hiye wainihenere hiyeta.

¹⁴ Hiyaiya, Cristo terota atyo mehexaikohaliti isa womana hoka judeunae, majudeuneharenae harenai hahotyaliharerota moheta. Wainihenere hiyeta emaisaheta wirawaiyakakoane talare akerehare haware xakini mokitere wiso.

¹⁵ Hoka judeunae xaotyakiraho, ewakanahoha xoaha miyatya, hoka hinama hotyali tyaoniterenae atyo hahotyaliharerota moheta, waitare hotyali exahe exema maniya nawenatyaseharenai. Nikare mehexaikohare mohenahitene.

¹⁶ Wainihenere atyalihose xaimaholatyaka hiyeta Cristo emaisatya irawanekakoati. Hoka atyalihose xaimaholatyaka hiyeta ahohisakoaheta hinama hotyali halitinae hoka hahotyaliharerota mohenahitene hoka ekaokakihenahitiyene Enore haliya.

¹⁷ Nikare Cristo tyoa hoka xakaihakatya tyotya ihiyea Iraiti Waiyexe amehexaikohalikisare. Xiso majudeuneharenai, seko xisaoniternai Enore nonitata ana, exahe judeunai, koxaka ehaliya tyaoniterenai xoaha ana.

¹⁸ Wityotya judeunai, majudeuneharenai kakoita Cristo hiyeta wiyanewikaokehena Wexe Enore nahalakoa Isekohaliti isejenere womana hiyeta.

¹⁹ Hatyo hiyeta xiso majudeuneharenae atyo maisa hahotyalihareheta, exahe mawaiyakaharenaeheta xini. Xiso atyo kalikini Enore anere hotyalinai terota xisaonita. Ehotyalihare atyo xisaona.

20 Xiso atyo hati waharexe akereta. Jesus niraene kakoarenæ, exahe toahiyere iraiti xakaisaseharenæ atyo ehokolikase akereta. Hoka Jesus Cristo atyo ekotaxanekase akereta.

21 Hatyo ekotaxanekase atyo aiyatelikijita hati hoka hatyaoseta kinatere tyaonita. Ekakoitaite memere tyaonita hoka Xekohaseti hana waiyexe terota tyaona.

22 Nikareta tehitiya xiso. Hahotyalita Cristo kakoa xisaonitere hiyeta xikaomakita, hahotyalita haiyanai kakoa hali hati xisaona maheta, hoka hatyo hati ako atyo Enore tyaonita Haisekohare maniyata.

3

Paulo Hatene Majudeuneharenæ Koni

1 Hiyeta hoka niraexaita Enore ana. Hiayi, natyo Paulo Jesus Cristo tahi akiti noxakaitere xiso majudeuneharenæ hiyeta kalikini berexo notyaonita.

2 Kala koxaka waiyecephalaka xomana, Enore haxawaiyera hiyeta, exe hateniti isehenere nomani waiyexe xawenane niyahare tahi akiti naoka.

3 Enore atyo hotikisa nomani haxahékola metaharexe. Awaiyecephalakatene nomani hoka ini-næ naxairatene.

4 Xakaexaretyaiya naxairahenere hoka waiyecephalaka xomana Cristo xahekola metaharexe waiyecephalakitere nomani.

5 Toahiya xowaka exe metaharetere maisa xala hare ana waiyecephalakere hoka kalikini atyo Enore hotikisa exe metaharexe Haisekohare

hiyeta, waiyexe haxaotyakiraharenae exahe iraiti xakaisaseharenae xoahanae ana.

⁶ Exakerexe atyo exe iraiti metaharexe: Iraiti Waiyexe hiyeta atyo majudeuneharenae anere tehitiya tyaona judeunai anere waiyexe tyaonitere enokoare. Haterore hárē hiyeta atyo tyaonahitaha hoka Enore isa aokowihenereharenae enomanaha, Jesus Cristo hiyeta atyo enomanereha terota.

⁷ Exomokakahare atyo natyo Iraiti Waiyexe noxakai maheta Enore xaokalita. Waiyoliniti, iyateliti harenae Enore isa nomaní, kalore haiyatere hiyeta.

⁸ Natyo atyo tyotya Enore anerenae katyahakoreta, xakore hoka iraiti waiyexe xakaisasehare atyo aoka natyo. Cristo tahi wenati masakare waiyexe noxakai maheta majudeuneharenae hiye.

⁹ Nawaiyekehala katya tehitiya tyotya halitinae ana exahekola metaharexe maheta. Hatyo atyo tyotya xoalini hare tyoma, xakore hoka hatyo metaharexe wahakiya maisa hotikisare hekoti.

¹⁰ Exakere moka hoka kalikinita kalorexenae enokoa tyaonitereharenae exahe anjonae xoaha ana waiyekohala maheta Enore nawaiyore, tyakekohatiyenae nawenane hiyeta.

¹¹ Nikare Enore ahekotya, haxahékola matyotenehare hiyeta hoka hatyo haxahékola akereta tyoma mematene Wiyekohase Jesus Cristo hiyeta.

¹² Hoka Cristo xema maniya wisaonitere, wityakekohenerene xoaha hiyeta atyoite wimamairanehareneta wiyané wikaoka Enore nahalakoa.

¹³ Hatyo hiyeta awatyo xamaikohare iniyala-hare nokaxomokakitere xihiyeta hiyeta kakoa. Hiyaiya, exakerexe atyo nokaxomokakita waiye xikaxomokaka maheta.

Cristo Nawaiyexehare

¹⁴ Hatyo hiyeta nokaolise kakoa notyoka wexe Enore nahalakoa hoka niraexaita.

¹⁵ Ihiyeta atyo kahotyaliyeharenai enokoa, waikohekoa xoaha tyaoniterenai kakaexaretyakita.

¹⁶ Hoka Enore naxita hoka kasani kalore waiyexe kakoa tyaonitere hiyeta, isa iyateliti xomana naokita Haisekohare maniyata hoka xikinatere xisaona maheta.

¹⁷ Naxitene tehtiyya, kasani xityakekone hiyeta, Cristo tyaona xikakoa naokita. Exahe niraexaita xomana, kasani atya akereta xikatyaharexe xisaona, exahe hati hokoli kase akereta xikinatere xisaona xiyawaiyetyakakoane kakoa hoka

¹⁸ waiyeckehalaka xomana naokita tyotya Enore kaxaikoneharenae kakoa Cristo xawaiyera: enerokoa, enowahahare, ewahaharene, ehatekone harenai naokita.

¹⁹ Nikare hoka waiyeckehalaka xomana maheta exawaiyera, exahe xakore atyoite maisa masakare waiyeckehalakita xomana hoka. Hoka hatyo hiyetaite Enore tyaona xikakoa kaiserehare.

²⁰ Kasani Enore kakoa kaihalaharetyaka kaiserehare naokita. Hoka iniyatere tyaonitere winekoni hiyeta, waxitere, wahekoitere xahexe tyoma womana.

21 Maika Enore kakoa kaihalaharetyaka tyakekohatiyena hiyeta, Jesus Cristo hiyeta xoaha tyotyaki ferakene, exahe matyotenehare.

4

Cristo Háré Tahi

1 Hatyo hiyeta natyo tyare berexo notyaonita nahakitere Xekohaseti Jesus Cristo ana hiyeta hoka niraeta xihiye. Maika hetati Enore aohenere xiso xowaka waiye xisaona aohenere akereta xisaona.

2 Maika ximaxahenerahare, xasemaxematyare, ximehexaikohare xisaona. Awa atyo kinatyaxa xirae haiyaharenai kakoa. Xahotikisa enomanaha xiyawaiyerahene.

3 Maika xaiyateretyoahena hoka mehexaiko-haliti hiyeta hahotalita Isekohaliti mokitere xiso xema xisaona.

4 Cristo hare atyo haterore, Isekohaliti Waiyexe hoka haterore. Enore aoka xiso haomana hoka haterore atyo xiyatyahane.

5 Haterore atyo Xekohaseti, haterore atyo tyakekoti, haterore atyo batixat�ati.

6 Haterore atyo Enore, tyotya Nexe atyo, ex-ahe tyotya Xekohase atyo. Hakita atyo tyotya ihiyetaha, exahe tyaonita atyo tyotya ekakoaha.

7 Wityotya, hatya ana xakini xoalini hare waiyexe kaxekaka, Cristo isehenere womana hakakoaneta.

8 Hiyaiya, exakere atyo Iraiti Waiyexe nexa: Enokoa xanehenere xowaka kahare kolatya berexoako tyaoniterenae hoka isa xoalini hare waiyexe halitinae ana.

*Waiyoliniti, Iyateliti Waiyexe Enore Isa Halitini
Ana*
(Romanos 12.6-8; 1 Coríntios 12.4-11)

9 Xoare nere “enokoa xane”, nita? Exakerexe atyo: hetati exoa ako katyahe hotohare. Hatyo najikinita eno xeta xane.

10 Exoa ako katyahe hoka hatyo najikinita enokoa xaneheta hoka enokoa xaihako xane hoka tyotya waikohekao, enokoa xoaha ekaisetya hawenane kakoa maheta.

11 Hatyo atyo isa xoalini hare waiyexe halitinae ana. Hoka haiyanai hairaene kakoare moka, haiyanai iraiti xakaisasehare moka, haiyanai xakaihakatya maheta iraiti moka, exahe haiyaharenai hoka tyakekohatiyenai kaxaikotyase, xaotyakisase maheta moka.

12 Nikare mokahene, Enore kaxaikoneharenai awaiyolinikisaha hoka waiyore hakaha maheta Cristo hatene hoka Cristo háré waiye kekoare maheta.

13 Nikare ite haxawalita wityakeko hoka waiyekehala ite womana Enore Ityani tahi akiti. Nikarite hoka wawenane waiyexe hiyetaite wikekoareta akereta wisaona hoka Cristo aokitere akereta wisaona.

14 Nikare ite wisaona hoka maisa xoima akereta wisaohitita. Hiyaiya, xoima atyo hoholati one ainakiyahena hoka nolokehekoaitene, exahe kinatyawiniti hoka herawasekoaitene. Hatyo akereta atyo haliti maoseratyaliyenai tyaonita hoka hahinaeharenai nawenane aiyalaharetyahitaha. Waiyore maoseratyahitene hoka xaotyakisati ehaikoare xema maniya mokahitene.

15 Iraiti waiyexe tahi taitaiya wirae, exahe wawaiyexeharene kakoa hoka wikekoareya wawenane Cristo koamaniya kakoa. Hiyaiya, hatyo atyo wiseri.

16 Eháre atyo iniyatere hiyeta waiye kinatere haxawalita tyaonita. Tyotya tyaonitere eháre hiyeta haxawalita tyaonita, kahinae tyakakoahitaha, hoka waiye tyaonahitaha. Hiyaiya, hakititere atyo waiye tyaonehena eháre hiyexe hoka tyotya eháre atyo waiye kekoareta xawaiyetyakakoati hiyeta.

Wenati Waitare Cristo Hiyeta

17 Hatyo hiyeta Xekohaseti nexare kakoa niraetene, naiyateretyoahena: Awa atyo Enore maniya mawenaneharenae akereta xisaona. Hiyaiya, exahekolaha atyo maisa xoare tyomare.

18 Exahekolaha atyo makaliroti akerehare tyaonita. Maisa atyo Enore waiyexe aokitere xema maniya tyaonareha, maisa waiyorexeha, exahe semaxematyareha.

19 Tyotya ehaiharenaha enonitaha, exahe isoawiha haxawaiyeraha ewaxirahare ana, tyotya kahaiharettyakiterehare xoaha ana.

20 Maisa atyo hatyohare tahi kakoa xini xawaiyore Cristo koamaniya xisaona maheta.

21 Aliterexe ala xasema etahi, exahe xisaonitere exema hiyetala xawaiyore aliterexe Jesus hiye tyaonitere kakoa.

22 Xahalakihena toahiyere xawenane toahiya ewaxirahare xisomitere, xahekoitere. Hiyaiya, hatyoharenai atyo iniyalahare xiyahekola mawenekoaretita.

²³ Maika xiyahekolanai tyotya xewaitareheta.

²⁴ Xisaohena waitare wenati xema, hatyoharenai atyo kaomaka Enore aokitere akereta, hatyoharenai atyo kawaiyakita wenati aliterexe hiye, hatyohare atyo tota, waiye xoaha.

Wenati Waiyexe

(Gálatas 5.22-24; Efésios 4.1-3; Filipenses 4.8; Colossenses 3.12-17)

²⁵ Hatyo hiyeta nikareta xamaoseratya. Xirae-hena xihinaehare kakoa hoka aliterexe taita xirae ekakoaha. Hiyaiya, wityotya atyo Cristo háré hiyetare.

²⁶ Xeharehena hoka maika xirihare xisaona hoka maisa iniyalahare xisomita. Awa atyo xeharekoata mene.

²⁷ Awa atyo ini hekoti xahalakihena xawenane Tihanare ana.

²⁸ Xala xamani ene kaiwita hoka nikareta kaiwa hoka hahena kaisere hoka waiye tyaona, exahe kahinaetya maxiyehareharenai.

²⁹ Awa atyo ewaxirahare kehaisakere xirae. Maika waiyexe iraiti taita xirae hoka haiyaharenae kekoare Cristo koamaniya hawenaneha kakoa, exahe aokahitere harenai akereta tyaonaha, hoka xiraetereharenae semehenerenae ana waiye.

³⁰ Awa atyo xexamaikohalinikihena Enore Nisekohare Waiyexe. Hiyaiya, Isekohaliti atyo Enore feroxa akereta tyaonita xihiy. Heko ite tyaona xikakoa Enore iyehetehenere xiso kijiya.

³¹ Xahalakihena irawaniti, xehaliti, xahenexatyati, xiholakakoati, iraeharetyati harenae. Awa atyo xiyalijinihare.

³² Awa atyo hatyoharenae xema xisaona. Xawaiyexehare xisaohena, waiye xamokakoa haiyaharenae kakoa. Ximaotyanekakoahetehena iniyalahare xománe kakoanae, iniyalahare xománe Enore maotyanehetehenere Cristo hiyeta akereta.

5

Maika Waiye Xisaona, Awa Atyo Iniyalahare Xisoma

(*1 Coríntios 6.9-10; Gálatas 5.19-21; Colossenses 3.5-6; Apocalipse 21.8, 27*)

¹ Xisonae atyo Enore ityaninae, ixiyakawala-harenae. Hiyeta hoka Enore tyaonitere akereta xisaohena.

² Maika xawenane xawaiyetyati xema tyaona, Cristo awaiyehenere wiso akereta, hoka wainihenere wihiyeta akereta, hoka airaxero airaxexe, exahe Enore awaiyetitere jihatyati xoaha akereta xisaona.

³ Enore anere hotyalinai tyare atyo xiso hoka maisa atyo ehekoreta xini xiraekakoita ohiro watyalisaka, masemaxematyati, maiyasetyati xoaha tahi.

⁴ Awatyo xiraeta iraiti kehaisakere, maomaxe-tahare, ewaxirahare. Hiayiya, hatyoharenai atyo maisa xomanere xini. Xakore hoka maika xihala-harehena Enore kakoa.

⁵ Waiye xasema exeharenai: maisaiya hatya ohiro hiye tyaoniterehare, mahaiharenahare, mahakaiserexe, maiyasehatiye harenai xane tyaonita Cristo, Enore xoaha nawenakala nali. Hiayiya, maiyaseti atyo enore metalahare xema nawenatyaka akerehare.

6 Hoka maika maisa xalahare hairaene mao-maxetahare kakoa maoseraita xiso. Hiyaiya, hatyoharenai hiyeta atyoite Enore iniyalahare mohena hamatyakekotyasenai.

7 Hatyo hiyeta awa atyo nikare tyaoniterenae xema xisaona.

8 Hiyaiya, toahiya ene xisonai makaliroti koni xisaonita, xakore hoka Enore anerenai hotyalinai xisaohenere aoseta atyo xaokanatyakalati koni xisaonita. Hatyo hiyeta maika xaokanatyakalati koni nawenatyaseharenai akereta xisaohena.

9 Hiyaiya, xaokanatyakalati atyo kalore ekaotyakatita waiyexehaliti, waiyexe wenati, exahe aliterexe xoaha.

10 Xaiyateretyoa hoka xawaiyore Xekohaseti aokitereharenae kakoa.

*Maika Awa Iniyalahare Xema Xisaona
(Colossenses 3.7-9; Hebreus 3.7-13; 1 João 2.15-17)*

11 Awa atyo haiyaharenae iniyalahare tyomiterenai akereta xisaona, hatyohare atyo makaliroti koniye. Xakore hoka maika xahotikihena tyotya hatyoharenai xaokanatyakalati ana.

12 Hoka aliterexe atyo kahaiharetyakere kairaetyakita hatyohare hameteneta tyomahiterehareha tahi.

13 Hoka tyotya kahotikisakehenere xaokanatyakalati ana xowaka atyoite kawaiyakehena hatyohare enómanenai.

14 Hiyaiya, waiye kawaiyakehetehenere atyoite xaokanatyakalati tyaona. Hatyo hiyeta exakere nexa:

“Hiso, nemakitere, hikaosehena! Hatityoahetehena hikamanaoseta, hoka Cristo ite aokanatyá homana”.

¹⁵ Hatyo hiyeta waiyira xiayiyeña xawenane. Awa atyo mawaiyoreharenai akereta xisaona, xakore hoka maika waiyorexenai akereta xisaona.

¹⁶ Awatyo haferakene hekoti xametaisa. Hiyaíya, kalikini wisaoniterenai ferakenenai atyo maisa waiyexe.

¹⁷ Awa atyo xihatyahare. Xaiyateretyoa Xekohaseti aokitereharenae waiyekahalaka xomana hoka aokitere akereta xisaona maheta.

¹⁸ Awa atyo vinhoxa xiserahená hoka xaheka. Hiyaíya, hatyoharenai atyoite ximawaiye nawenankisase maheta. Xakore hoka maika Enore Nisekohare kakoa kaisere xisaona.

¹⁹ Xiyakaihakatyakakoahena haiyanai kakoa salmos nanekoare tahi, exahe xeratinai waiyexenai tahi. Xiyerehena xeratinai Xekohaseti anere xiyawaiyerene kakoa.

²⁰ Maika xihalahare menehena Wexe Enore kakoa, tyotya xoalini hare hiyeta, Wiyekohase Jesus Cristo koamaniya xawenane hiyeta.

²¹ Xaiminijitere Cristo akeretaira xaiminisakakoahena.

*Kaiyanityorenæ Exahe Kaiyaneneronæ
(Colossenses 3.18-19; 1 Pedro 3.1-7)*

²² Ohironae, xexanenenaira xaiminisa, Xekohaseti xaiminijitere akereta.

²³ Hiyaíya, ena atyo haiyanityo xahehare, Cristo tyakekohatiyenæ xahehare tyalonitere akereta.

Cristo terota atyo waiyexe maniya mohenahitahene hoka hatyo terota eháreha.

²⁴ Hatyo hiyeta xasemaxematyia xexanenena niraene, tyakekohatiyenae semaxemaitere Cristo niraene akereta.

²⁵ Xasemehena, xiso exanenena: xawaiyetyaira xexanityonae, Cristo awaiyetya haomanerena hoka wainihenere enomanaha akereta.

²⁶ Nikare tyoma haware mokahene Enore ana maheta. Tihehetahene one kakoa, hoka iyoma mohenahitene hairaene kakoa.

²⁷ Nikare moka tyakekohatiyenai exema maniya tyaoniterenai, kasani hotikisha hawaiyexehare, hawaiyene, makawe xomokoanehare, exahe maiyalaharehare enomana aoka hoka.

²⁸ Maika enanae awaiyehena haiyanityonaeha, haháreha awaiyetyahitere akereta. Ena awaiyetiterehare haiyanityo atyo awaiyetyoawita.

²⁹ Hiyaiya, maisa xala hare kirawanexe haháre, hoka tyaijitenet, kaxaikotene harenai. Nikareta Cristo waiye kaxaikota hakaxaikoneharenae.

³⁰ Hiyaiya, Cristo hare hiyetare atyo wiso.

³¹ Exakere Iraiti Waiyexe nexa:

Hatyo hiyeta hatya enaite halakisa hanexe, hani tyo xoaha tyaona maheta haiyanityo kakoa hoka hatyo hinamanai atyoite haterore tyaoheta.

³² Kalore atyo exe metaharexe xakore hoka nomani atyo Cristo, exahe tyakekohatiyenae harenae tahi iraeta naoka.

³³ Xomanere tehitiya: Maika xiso exanenena hoka xawaiyehena xexanityonae xawaiyetyoawiterte akereta, exahe xiso exanityonae hoka xaiminihena xexanenena.

6

*Xoimanae Exahe Nerekati, Nityokati
(Colossenses 3.20-21)*

¹ Xasemehena xiso xoimanae: Cristo koamaniya atyo xisaonita hoka xityakekohena atyoite xexe, xityo xoaha niraene. Hatyoharenæ atyo waiye.

² Exakerexe atyo xaotyakiyaho nexa: “Xaiminihena xexe, xityo xoaha”, nexa. Hatyo iraiti hotohare xoalini hare waiyexe xekaka tahi kakoare aoka Enore.

³ “Xaiminihena xexe, xityo xoaha hoka waiye xisaona, exahe wahakiya xoaha xisaona waikohetka”, nita xoaha.

⁴ Xasemehena xiso inityo, enexe xoaha: awa atyo xityaninae maxemerehareta xoana xamani xamoka hoka xaihalikisahene. Xainaetyahene kaisere Xekohaseti xaotyakiraho waiyexe kakoa.

*Wakaharenæ, Exekohasenæ
(Colossenses 3.22-4.1; 1 Timóteo 6.1-2; Tito 2.9)*

⁵ Xasemehena, xiso wakaharenæ: xasemaxematya xiyekohasenæ niraene ximairane, xiyaiminira kakoa. Maika nikare xisaona, motyaira aliterexe Cristo ana ene xahakita.

⁶ Awa atyo ehaotiha taita waiye xahaka ihalahare xikakoa maheta. Hiyaiya, Cristo wakaharenæ atyo xiso hoka Enore aokiterte akereta xahaka enomanaha.

⁷ Xihalaharene kakoa xahahena enomanaha, Xekohaseti ana kahakatyakitere akereta, maisa halitinae ana kahakakitere akere xini.

⁸ Xasemehena, xotyaxematyaira exeharenai: Hatya ana xakini atyoite, wakahare exahe mawakaharenehare xoaha ana, Xekohaseti iseheña tyomehenahere akereta.

⁹ Xiso xekohasetinae tehitiya hoka waiye xamoka xiwakaneharenae, waiyehena xikirawana-hene. Hiyaiya, xiso exahe xiwakaneharenae harenai atyo Xekohaseti enokoare anere makere hoka hatyo atyo hakakoa mokita halitinae.

*Maika Heko Xityakekone Xema Xisaona
(1 Coríntios 16.13-14; Gálatas 6.9-10; Filipenses 4.1; 2 Timóteo 2.1-3)*

¹⁰ Hoka maika kalikini xikinatere xisaona Xekohaseti koamaniya xisaonitere hiyeta, exahe kalorexe iniyatere xoaha hiyeta.

¹¹ Xamokaharetyoahena xaisakakoati anere Enore ijitere xomana kakoa hoka xikinatere xisaona, hoka xahalakoahare Tihanare maisa xoana mokita xiso maheta.

¹² Hiyaiya, maisa atyo halitinai xahita xini waiyateretyoita, xakore hoka isekohalitinai iniyalaharenai enokoa tyaoniterenai niyatere xahita atyo. Hatyonai atyo: kalorexenai, xekohasetinai, totakorako iyatelitinai tyaoniterenai harenai, kalikini makaliroti hetehena xowakiyerenai.

¹³ Hatyo hiyeta xamokaharetyoahena xaisakakoati anere Enore ijitere xomana kakoa. Nikare ite hoka iniyalahare ferakene kaokehena hoka xikinatere xisaona xahalakoahare xahita,

hoka xiyalijinihare kakoahenere najikinitaite hekota xikinatere xisaona, ximaekoaneharefa.

¹⁴ Hatyo hiyeta maika ximemere xisaona. Iraiti aliterexe xema xisaohena hoka hatyo atyo ite xiylakitakohi akereta tyaoehena xomana. Waiyexe maniya xisaona hoka hatyo atyo ite xitikolali talatyakala akereta tyaoehena xomana.

¹⁵ Xihalaharene kakoa xiyakaihakahena Iraiti Waiyexe amehhexaikotyakisare hoka hatyo atyoite xikijitini akereta tyaoehena xomana.

¹⁶ Hoka maika heko xityakekone xema xisaona hoka hatyo atyo ite xitalatyoakala xaiyakoti akereta hoka xewakatya maheta tyotya Tihanare nokolanai takoiterenai.

¹⁷ Xisekohare niyasehare xema maniya xisaoehena hoka hatyo atyo ite xiseri talatyakala akereta tyaoehena xomana. Exahe Enore niraene xema maniya xisaona hoka hatyo atyo ite kesekase akereta tyaoehena xomana. Hiyaiya, hatyohare atyo Isekohaliti Waiyexe ijita xomana.

¹⁸ Tyotya hatyoharenae xisomehena xiraexala kakoa, xaxehena Enore hoka kahinaetya xiso. Xiraexata menehena Isekohaliti Waiyexe hotiki-jitere xiso akereta. Xirihare xisaona. Awa atyo xamaikoharehena, xiraexata menehena tyotya Enore koamaniya tyaoniterenae ana.

¹⁹ Xiraexatya tehitiya notahi hoka waiyekehala laka iraiti noxakai halitinae hiye, exahe hoka nomamairanihare noxakaihakatya Iraiti Waiyexe metahare tyaonitere, exahe waiyekehala noxakaini maheta.

²⁰ Natyo atyo Iraiti Waiyexe kakoare xakore hoka kalini atyo berexo notyaonita. Hiyeta

hoka xiraexatya nomani hoka nomamairanihare noxakaihakatya iraiti halitinai hiye, noxakaini kaxaokakehenere akereta.

Tyawaxakakoati Miyane

²¹ Tíquico ite xakai xihiye nawenani tahi hoka waiyekehala xomana. Tíquico atyo waiye kahinaetya wiso Xekohaseti hatene hiye.

²² Hatyo niyahare terota naxikatene xomana hoka xakaihakatya wawenane tahi akiti xihiye hoka xasema witahi hoka xihalahare maheta.

²³ Maika Wexe Enore, Wiyekohase Jesus Cristo hoka mehexaikohaliti, xawaiyetyakakoati, tyakekoti harenae isa xomana.

²⁴ Kasani Enore waiye moka tyotya Wiyekohase Jesus Cristo awaiyetiterenae haxawaiyera matyotenehare kakoa naokita, eko xoaha.

Waitare Wenati Aho New Testament in Parecís (BR:pab:Parecís)

copyright © 2012 Wycliffe Bible Translators, Inc.

Language: Parecís

Translation by: Wycliffe Bible Translators, Inc.

Parecís [pab], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Parecís

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
6c7be6d9-c7f4-528f-bc3f-f1e6ef0d9943